



Rabu 16 Pebruari 2021

Ogen: Jeremia 46:27-28



Ukumen Si Bujur



Ngerana kita kerna ukumen si bujur, lit kawitenna ras keadilan. Biasana ise si ersalah ndatken ukumen rikutken beratna kesalahen si ilakokenna. Banci ukumen e telu bulan, deba seh setahun, adi mberat kal kesalahen e banci seh sepuluh tahun entah ukumen seumur hidup. I bas hakim enggo lit kerina sukat-sukatna kesalahen e ras ia me si mutuskensa uga dekahna si erbahan kejahatan e i ukum. Sekali enda kita ngerana kerna Dibata si mereken ukumen man bangsa Israel. IjadikeNa diriNa jadi hakim man bangsaNa jine erkiteken kesalahen si enggo ilakoken bangsa Israel. Kesalahen e cukup mbelin i bas mata Dibata sebab bangsa e pang nundalken Dibata, alu mindo penampat man bangsa si akapna megegeh, ras ikut nambah dibata-dibata bangsa si nampati ia. Teridah maka la ia tek nandangi kuasa Dibata ras meraguken Dibata e jine. Perbahanen si bage tuhu encedai pusuh Dibata emaka itetapkeNa nehken ukumen man bangsaNa 70 tahun i tamaken jadi pembuangan Babel. Ukumen e Tuhan jine netapkensa ras ise pe labo ngasup ngubahsa. Arah ukumen e labo ateNa gelah bangsaNa kernep, entah gelah kerina ndauh ras IA, tapi gelah lit dalan-dalanna bangsa e meteh ras nggejapken kesalahenna dingenggit mulih ku Tuhan. Ietehna min maka labo lit gegehna entah pe gegeh banga si deban lako mulahi ia bas perbebenna nari sekatan Tuhan. Inanamina min perkuah ate Tuhan tupung ia i bas pembuangan. Guna sie ikataken Tuhan man bana maka ipulahiNa me bangsa e ibas inganna tertaban nari. Payo, Tuhan erkeleng ate, ukumen si ibahanna e pe situhuna ban keleng ateNa. Kejahaten si ibahan kita e nembah ateNa tapi situhuna ngenehen kita mekuah ateNa. Emaka kejahatenta iukumna tapi padan keselamatan lalap ipesehna man banta. Ibas paksa enda pe perlu kita ngerenung, megati siakui pantas kal kita ngaloken ukumen, alu e erlajar kita jera.